

摘藻堂四庫全書薈要

集部

欽定四庫全書薈要

集部
山谷外集卷十一

詳校官助教臣謝登雋



欽定四庫全書薈要卷一萬五千一百八十二

集部

山谷外集卷十一

宋 黃庭堅 撰

楚詞八首

至樂詞

錄夢篇

秋思

悼往

聽履霜操

并序

鄒操

并序

渡江

毀壁

古詩五十四首



流水

虎號南山

采菊

新涼示同學

宿山家效孟浩然

病懶

宿靈湯丈室

戲贈諸友

午寢

題徐氏姑壽安君壽梅亭

次韻叔父臺源歌

息暑巖

博山臺

潯陽江口阻風三日

過百里大夫冢

蒲城道中寄懷伯氏

舟子

并序

思賢

并序

漫尉

并序

按田

并序

送蘇太祝歸石城

寄季張

贈陳公益

并序

將歸葉先寄明復季常

送張仲謀

擬君子法天運

傷歌行四首

行行重行行贈別李之儀

春思

戲荅公益春思二首

衆人觀俳優

次韻任公漸感梅花十五韻

荅王晦之見寄

寄懷藍六

送焦浚明

新寨餞南歸客

曉起臨汝

荅閻求仁

送陳季常歸洛

雨晴過石塘留宿

次韻荅薛樂道

戲贈陳季張

寄別陳氏妹

戲贈王晦之

觀崇德墨竹歌

并序

送陳蕭縣

逍遙亭

送何君庸

寄趙正夫二首

楚詞八首

至樂詞寄黃幾復

余汎觀於天下兮何者樂而誰者足憂憂於窘窘不得兮樂
盡萬物而無求翫聲色而弊形性兮維造化之螟蠹將逍遙
鑪錘之外兮尚何俛首而嬰此細故百年存亡得失兮吾既
視奕棊與擣蒲寒暑蚤夜極則遷兮有滿則有虛應龍之不

拘繫兮寧與羸馬帖耳而求芻雲升雨降兮上下有無入與
神會兮出與化俱無對於天下兮制命在予賈羣囂而我靜
兮豈其跨一市以求直乃有德人相與友兮忘我於忘言之
域廓宇宙以為量兮奚自適而不通遂風休而冰釋

錄夢篇

春風亂思兮吹管絃春日醉人兮昏欲眠却萬物而觀
性兮如處幽篁之不見天試縱神而不御兮如有順心
之洒然委蜩甲而去化乘白雲而上仙因天倪而造適

觀衆妙之玄玄風開閭闔而進予帝示予以化物之甄
予撼玄關而去牡帝宴笑以忘言吾見萬靈朝明庭兮
冠佩如雲煙名聲毀譽之觀兮差無以異乎人間息心
於慕羶之蟻會理於止水之淵與我游物之初兮曰是
可以解而縣不知其所以得兮而冷然似有所存歸占
夢靈兮盖天振吾過矯心以循理兮殆其沃水而勝火
故喜曲轅之櫟以得祥驚主人之鴈以近禍離水火而
天兮廼得使實自我蕩然肆志兮又烏知可乎不可

亂曰芻狗萬物兮天地不仁體止而用無窮兮播生者
於迷津有形而致用者之謂器無形而用道者之謂神
背昭昭而起見兮聚墨墨而生身犯有形而遺大觀兮
動細習於游塵彼至人而神凝兮同予夢而先覺顧天
下孰不學兮廼會歸於無學予心之不能忘兮將波流
風靡而奈何唯鎮之以無名之樸

秋思

和荅幼弟阿熊呈上
六舅學士先生并引

庭堅之少也學於舅氏而後知方長就食於江南北

間不拜請益之席蓋十三年歲在星紀實作此文申
寫依歸之願

柴門扃兮牛羊下來其已久四壁立兮蛩蛩太息不可
聽夜冉冉兮斗魁委柄若授人天寥寥兮河漢風浪西
南傾山川悠遠兮誰獨不共此明月維德人不見兮采
薇蕨于江之南風露寒兮薇蕨既老而苦澁江道險難
兮不知先生之何食往予窺道而見兮俯甘井以解渴
天地施我生兮先生厚我德水波無津兮既拯我舟杭

路微徑絕兮又翦我荊棘秉道要而置對兮一與而九
奪曾不更刀兮破肯綮於胷中湛湛兮如長江之吐月
霏霏兮若旋盤之落屑會鉏鋤於一堂兮曾不侮予以
色辭星翻翻其爭光兮觀北斗之運四時維回首之日
淺兮又穿鼻而伏阜乘流下兮忽不自識其闕遺悲去
日之既往兮愛是日之方來有玉於橐兮師以為王所
之器維昔之不謨獻之維今之莫予琢之起望天極南
兮僕夫其穀予馬恐著龜之遠兮入鮑肆不知其化子

歌犁然隱余心兮為而三歎其一和微子之昌言兮殆
莫振余過已矣乎芳蘭無澤兮歲邁衆芳歇兮曷予佩
之求絕萬里兮吾以子牛橫大川兮吾以子舟竊悲吾
子之多暇日兮愁嗟黃落如郢客之見秋

悼往

西風悲兮敗葉索索照陳根兮秋日將落髣髴兮夢與
神遇顧瞻九泉兮豈其可作俄有悲秋之羽蟲兮自傷
時去物改擁舊柯而孤吟四郊莽蒼聲斷裂兮久而不

勝其歎音平生之梗槩兮欲蕭蕭而去眼將絕之言語
兮忽歷歷而經心謂逝者有知兮何喜而弃此去也謂
逝者無知兮誰職為此夢也憑須臾之不再得兮哀此言
之不予聽回廊窈窕月皓白兮無復曩時之履聲擊平
生之餘製兮鄉澤其猶未泳雖飄飄其日敗兮吾不忍
改其此佩愁薨薨其中予兮如醪酒之不化歟別離之
幾時兮誰與此夏日冬夜自我先兮一無窮在我後兮
亦一無窮六七十便了一生兮何異木末之有狂風待

外物而造適兮固不若放之自得之場彼莊生之一在
兮亦何異荀氏之神傷吾固知藏於天者至精交於物
者甚粗飲泣為昏瞳之媒幽憂為白髮之母憂來泣下
不可安排兮如孟津之捧土彼寒暑之寢化兮天地尚
不能以朝莫目煒煒而不寐兮夜疊疊而過中雖來者
猶不可待兮恐不及當時之從容

聽履霜操

并序

士有有意於問學不得於親能不怨者預聽斯琴予

故為危苦之詞撼其關鍵冀其動心忍性遇變而不
悔

靈宮窈窕兮寒夜永篁竹造天兮明月下影木葉隕霜
兮秋聲勤我以歲莫起視夜兮北山飲予斗柄幽人拂
琴而當予曰夫子則鍾期嘗試剡心而為之聽若有人
兮亦既修宴衽席之言兮不知其子之齊聖嘉孝子之
心終無已兮不忍忘初之戒命人則不語兮弦則語客
有變容而涕洟奄不知哀之來處悲乎痛哉葛屨翦翦

兮絺綌涼涼衣則風兮車上霜天雲愁兮空山四野竭
九河湔涕痕兮忽承睫其更下簷不憂其絺兮恤楚社
之不血食盡子職而不我愛兮終非父母之本心天高
地厚施莫報兮固自有物以至今雉雛雞乳兮麋鹿解
角天性則然兮無有要約哀號中野兮於父母又何求
我行于野兮不敢有履聲恐親心為予動兮是以有履
霜之憂古人之骨朽矣匪斯今也感然如動乎其指浩
然如生乎其心也聲音之發鈞其深也枯薪三尺惟學

林也

鄒操 并序

晉人以幣交孔子而召之禮際甚善孔子將渡河聞
趙簡子殺鳴犢舜華臨河而不進曰洋洋乎丘之不
濟此命也夫學者常以事不經見相與獻疑以為魯
哀季桓不足與有為也公山佛肸不足與有為也衛
以家聽南子齊以國聽田常陽貨亂入原壤之不肖
與之酬酢雍容禮貌而弗絕也簡子殺大夫何得罪

之深歟彼盖不知亡國之祥莫大乎殺賢大夫無罪而戮一民士可以捨祿無罪而殺一士大夫可以命車無罪而殺賢大夫鉏國之榦也鉏國之榦而不得罪於國人國非君之有也推此以行其孰不翦刈故君子見微歸在鄒作鄒操

歸歟懷哉此邦不可以遊眷吾車而有柎非河澣之無舟政何君而莫與君何國而莫求歲荏荏而老至慨時運之不逮洋洋乎水哉丘之不得濟也昊天不弔仁者

此無罪也攬國辟而家擅幾何而不殆也心病不可藥
手足未有害也鳥覆巢於主人鳳摩天而逝也求所用
生喪其生吾不忍蒙此蠱也豈曰如之何然後求諸蔡
也已乎已乎鳥獸山林則以食也天下有道丘不與易
也歸我休矣奉帝則也大同至小天地德也小物自私
智之賊也國無知兮我非傷悲兮騶御委轡四牡馳兮
心不慊於前驅又欲下而走兮中園有林斧所相兮大
厦我我不謀匠兮往者不可及來者吾猶望兮

渡江

行渡江兮吾無舟蕩蕩東注兮褰裳不可以遊漁橫舟
兮不即渡負萬里以在前兮無家反顧雲翳翳兮雨淒
淒不濟此兮誰與歸行渡江兮我無楫釋吾馬兮不可
以涉嗟行路之難兮援琴以身忘手不得於吾心兮聲
久抑而不張天泔泔兮又暮雨不濟此兮吾歸何處

毀壁

毀壁兮隕珠執手者兮問過愛憎兮萬世一軌居物之

忌兮固常以好為禍羞桃茱兮飯汝有席兮不嬪汝坐
歸來兮逍遙采雲英兮禦餓淑善兮清明陽春兮玉冰
畸於世兮天脫其櫻愛罍人兮冥冥弃汝陽侯兮遇汝
曾不如生未可以去兮殆而其雛嬰衆雛羽翼兮故
巢傾歸來兮逍遙西江浪波何時平山涔涔兮猿鶴同
社瀑垂天兮雷霆在下雲月為晝兮風雨為夜得意山
川兮不可繪畫寂寥無朋兮去道如咫彼幽坎兮可謝
歸來兮逍遙增膠兮不聊此暇

古詩五十四首

流水

一溪之水可涉而航人不我直我猶力行一溪之水不
枉而涉濡首中流汝嗟何及湯湯流水可以沐兮嗟行
之人則濯足兮

三章章四句

虎號南山

虎號南山民怨吏也

虎號南山北風雨雪百夫莫為其下流血相彼暴政幾

何不虎父子相戒是將食汝伊彼大吏易我鰥寡矧彼
小吏取桎梏以舞念昔先民求民之瘼今其病之言置
于壑出民于水惟夏伯禹今俾我民是墊平土豈弟君
子伊我父母不念赤子今我何怙嗚呼旻天如此罪何
苦

二章章八句
一章十句

采菊

采菊傷君子也君子將有為獨立而無依助是故傷之
南山有菊于采其英誰從汝往視我惇惇伊時之人誰

適有比不與我謀不如其已薄言采之遵彼山曲汝來
遲遲去我何速伊時之人誰適與同不與我好殆其覲
凶江漢滔滔有楫有杭誰以濟此中流且風嗟爾君子
時處時默微雲反覆無傷爾足

三章章八句

新涼示同學

西風先自無消息忽上青林報秋色天高月明露泥泥
團扇已從蛛網織蛩蛩何苦不自聊入我夜牀鳴唧唧
似言冰雪催授衣今者不樂君髮白春深花落病在牀

永夏過眼等虛擲卷簾昨莫得新涼空堂呼燈照几席
豈無熟書試一讀欲似平生不相識今日明日相尋來
百年青天過鳥翼夜闌歎息仰屋梁廢棄寢膳思無益
吾徒奈何縱嫚遊君不見禹重寸陰輕尺璧

宿山家效孟浩然

秋陽沉山西委照藩落下霧連雲氣平濛濛翳中野空
村晚無人一二小蝸舍老翁止客宿喬木縻我馬松爐
依稀煙槁竹照清夜幽泉抱除鳴生涯渺蕭灑翁家炊

黃梁殺雞延食罷問余所從誰庸詎學丘也投身解世
紛恥問老農稼予生久遭回百累未一謝班班吾親髮
弟妹逼婚嫁無以供甘旨何緣敢閒暇安得釋此懸相
從老桑柘

病懶

病懶不喜出收身卧書林縱觀百家治

一作語

浩渺半古

今空濛象外意高大且閑深聞有居覆盆豈能逃照臨
一馬統萬物八還見真心廼知善琴瑟先欲絕絃尋

宿靈湯丈室

臨池濯吾足汲水濯吾纓塵埃一謝去神與體俱清月

明漸映

一作隱

簷東出置枕東床夜蕭瑟更無俗物敗人

意唯有清風入吾室

戲贈諸友

時詔下

駕駘無長塗一月始千里驂騑嘶清風祇在一日耳詩
酒廢書史諸友勿自疑寧為駘駘懶當效驂騑嘶疏水
必有源析薪必有理不須明小辨所貴論大體生死命

有制富貴天取裁儻能領真意何有於我哉討論銷白日聖知在黃卷自此宜數來作詩情繾綣

午寢

戊申作

讀書常厭煩燕處意坐馳動靜兩不適塵勞敗天倪目昏生黥花耳聵喧鼓輦沉憂愁五神倦劇委四支不聊終日堪況乃久遠期投書曲肱卧天游從所之是身入華胥髣髴勝初時春蠶眠巨箔夏蜩化枯枝今之隱几者豈有異子綦覺寐湏臾間良亦休我疲廼知大覺夢

盖此德之歸誰為今日是二十二年非

題徐氏姑壽安君壽梅亭

大鷄銜枚來作亭小鷄銜實來種花兩雛反哺聲查查
慈烏髮白爾成家梅梁丹青射寒日梅英飛雪點親髮
二鷄同味如春酒壽親一笑宜長久金玉滿堂空爾為
有親舉酒世上稀生育劬勞安可報折梅傾酒著斑衣

次韻叔父臺源歌

吾家叔度天與閒晚喜著書如漆園臺平舊基水發源

但聞淙淙下林巒一朝斬木見萬象吞若雲夢胃中寬
漱滌泥沙出山骨混沌鑿竅物狀完茶甘酒美汲雙井
魚肥稻香派百泉暑風披襟著菡萏夜月洗耳聽潺湲
時從甥姪置樽俎此地端正朝諸山除書謗書兩不到
紫煙白雲深鎖關鄉人訟爭請來決到門懷慚相與還
呼兒理琴蕩俗氣果在巢由李孟間

息暑巖

水墨古畫山石屏雷起龍蛇枯木藤石囊嵌空自宮室

六月卷簾來曲肱松風琴瑟心可寫水寒瓜李嚼明冰
却登夏畦視耘耔烘顏炙背棲蒼蠅聞道九衢塵作霧
烏靴席帽如饋蒸歸嘗玉粒不敢飽高車駟馬何能乘

博山臺

宮亭只說香爐峰此地今見博山臺紫煙孤起麗朝日
定是海山飛得來化工造物能神竒不必驚世出蓬萊
千年隱淪被昭洗博山我勸爾一盃先生髮白足力強
遙思秋風醉幾回童兒數修掃洒職莫使石面霑塵埃

潯陽江口阻風三日

枯桑最知天風高旅人更覺時序迫去年解官出北門
猶纜江舩依賈客徂公七茅富貴天喜四怒三俱可憐
湖口縣前教戰鼓聲到潯陽渡頭船

過百里大夫冢

行客抱憂端

一作客行感時節

況復思古人何年一丘土不見

石麒麟斷碑畧可讀大夫身霸秦虞公納垂棘將軍西
問津安知五羊皮自鬻千金身末俗工媒孽浮言妬道

真幸逢孟軻賞不愧微子魂

蒲城道中寄懷伯氏

北征無百里日力不暇給山重鳥影盡露下月華濕寒
憶共被眠屢成回馬立豈如同巢鳥莫夜得安集

舟子

并序

予自大梁過汝求荷擔者有舟子來應傭行二日釋
負謝去曰吾雅善操舟甚不樂荷負之役賴肩而汗
垢豈所久堪歸且返吾故矣因遣之而作詩

黃須客子居水濱水行水宿忘冬春莽渺三江五湖外
短船無地不知津弓彎夜月射鳴鴈舳繫曉風歌采蘋
時望青旗沽白酒醉煮白魚羹紫萼平生未識州縣路
鷗鳥蒹葭成四鄰市人誘我利三倍輟棹一出幾危身
古來有道處漁釣豈與荷擔為儔臣欲論舊業誰知者
滿地車輪來往塵言歸明月滄波上依舊操舟妙若神

思賢 并序

思賢感楊文公遺事也公事章聖以直筆不得久居

中詔欲命公作某氏冊文公不聽卒以命陳公彭年
命下之日全家逃歸陽翟今者道出故邑冢木合抱
想見風烈故作是詩

楊家事業絕當時百家疏通問不疑高文大冊書鴻烈
潤色論思禁林傑堂堂司直社稷臣諫有用否不辱身
勁氣坐中掩虎口忠言天上嬰龍鱗忍能持祿保卒歲
歸去求田問四鄰今時此事久索漠吾恐九原公可作
我來回首行路難城郭參差夕照間風急飢烏噪喬木

孤墳牢落具茨山

漫尉

并序庚戌為
葉縣尉時作

庭堅讀漫叟文愛其不從於役而人性物理齎然詣
於根理因戲作漫尉一篇簡舞陽尉裴仲謨兼寄贈
郝希孟胡深夫二同年為我相與和而張之尚使來
者知居厚為寡悔之府然知我罪我皆在此詩

豫章黃魯直既拙又狂癡往在江湖南漁樵乃其師腰
斧入白雲揮車棹清溪虎豹不亂行鷗鳥相與嬉遇人

不崖異順物無瑕疵不知愛故厭不悔為人欺晨朝常
漫出莫夜亦漫歸漫尉葉公城漫撫病餘黎不篡非已
事不趨非吾時人罵狂癡拙魯直更喜之或請陳漫尉
壽尉蒲萄卮酒行激懦氣攘袂起哨規君子守一官烏
肯苟簡為奈何如秋葭信狂風離披漫行恐汙德漫止
將敗機漫默買猜謗漫言來詬譏漫尉謝荅客願客深
長思漫行無軌躅漫止無帛鞮漫默怨者寡漫言知者
希吾生漫叟後不券與之齊於戲獨如子因使目為眉

強顏不計返乾坤一醢鷄崑崙視糟垤既化不自知悔
吝雖萬塗直道甚坦夷覆轍索孤竹奔車求仲尼以旌
招虞人賤者不肯尸玉潤安可涸日光安可縑斯言出
繫表當以罔象窺賦分有自然那用時世移吾漫誠難
改盡醉不敢辭

按田 并序

余與晁端國思道奉檄按馬鞍山東港

音倦

河稻田陂

官丁誤引道左次水澤山深徑危泥濘堅冰長幹挾

馬僅可以度行五十里遂不容馬步沮洳虎迹新往
來烏鳥叢噪荆榛盡日出入乃至河上集近山之農
告以獻利者皆以為瀕水為舍居旁治新田果蔬有
畦桑棗成行自山之東西皆不可為陂港河原出四
頭山支分為三其一盡南出少折而東入舞陽其一
稍西流又折而北入石塘河其一港河也出山而東
流卒與二水合而入汝河汝河今漕河也吾二人既
臨河具知獻利者之狀而余獨有感焉頃歲肉食者

以羗胡為憂師老西鄙而士大夫知與不知爭道孫
吳覆軍殺將開虜之輕量中國心而富貴者今日比
肩近者朝言多在民事欲化西北之麥隴皆為東南
之稻田良吏攘臂起郡有召信臣縣有史起矣夫土
性者自先王所不能齊而一切不問孳夫故苗灌為
新田茫茫水陂丘壘平盡其君子威以法刑其小人毒
以鞭朴有舉斯有功有功斯有賞作者之議曰前日吏
持印相授以媮眼前而厚利弃於蒼煙野草之間是

豈不可笑以余觀之恐是非特未定也觀朝廷之意
初不責必成奉承者要必有功遂失之耳語曰事傳
三人輒失其真詩曰周爰咨謀蓋使指也今也咨謀
者不慘怛以告者未忠信歟夫聽言之道必以事觀
之奪民之故習而強以所未嘗其利安在興利者受
實賞力田者受實弊郡縣行空文朝廷收虛名名為
利民其實害之議者謂之有意於民乎吾不知也以
為有功於民乎今既若是矣予既有是言思道屢歎

而已是日所至已遠不能歸遂宿水濱民家北風黃
草破屋見星月與晁五引酒相酌忽然已醉不知跋
涉之勞也綴以詩強思道和之

河水積崢嶸山雪晴索寞幽齋怯寒威況復出城郭馬
為蜩毛縮人歎狐裘薄淤泥虎跡交叢社烏聲樂橋經
野燒斷崖值天風落洩雲迷鴻濛戴石瘦犂畷攀緣若
登天扶服如入橐窮幽至河麋落日更礧礧新民數十
家飄寓初棲託壯產無情農荒榛盡開鑿臨流遣官丁

悉使呼老弱恩言諭官意鄣水陂可作春秧百頃杭秋
報千倉獲棹頭笑應儂吾麥自不惡麥苗不為稻誠恐
非民瘼不知肉食者何必苦改作我行疲鞍馬且用休
羈絡艱難相顧歎共道折腰錯勢窮不得已來自取束
縛月明夜蕭蕭解衣寬帶索卧看雲行天北斗掛屋角
析薪爨酒鼎興至且相酌

送蘇太祝歸石城

蘇侯恃才頗跌宕常欲立談取將相風期家世非一朝

於我今為丈人行偶然把酒葉公城胸懷披盡能謔浪
畫燭如椽吐白虹花枝圍坐紅相向夜如何其不忍起
風吹日照離筵上醉中一笑揮萬金眼前快意誠為當
僕夫結束底死催馬翻玉勒嘶歸鞅南驅面有千里塵
道遠回首幾惆悵漢陽津上游女多何日石城蕩兩漿
莫倚廬家有莫愁便成翻手辜前賞

寄李張

園中看笋已成竹堦下種槐還得陰出門望君車馬絕

臨水問信鯉魚沉贈君以匠石斲泥之利器淵明無絃之素琴此書到日可歸來思子妙質為知音

贈陳公益

并序

官於葉城之下士之久遊而寡過者無若陳公益言中權衡行應繩墨中心誠樂其為人曾子曰目者心之浮也言者行之指也公益眸子晬清言寡而理贍其行於是乎可攷予嘗有窮谷蒼煙寂寞之約唯公益共之故系之以詩

陳子善學問正色鉏其驕束身居言前析理在意標心
隨出處樂性與寂寞超安安而雅雅不以行險徼王良
馭驥子冉弱六轡調自吾與之遊忘味如聞韶志道斯
近神莊生說承蜩顧恐陳子止誰能中道要我求一飯
飽黃綬強折腰取舍不由已悲哉馬銜鑣長嘯天地間
搔首獨無聊雅約青山雲伊人與逍遙有如渝此盟白
日尚昭昭平時多英豪楚楚在本朝吾徒固長物分當
老簞瓢

將歸葉先寄明復季常

初日照屋山好鳥哢簷角卷簾吏却掃齋舍寒蕭索呼
兒芻春醪期與夫子酌簡書驅我出衝雪凍兩脚莫行
星輝輝曉起雞喔喔青煙過空村商旅無遠橐豈不欲
少留王事苦敦薄平生白眼人今日折腰諾可憐五斗
米奪我一溪樂公等何逍遙睥睨寄講學談犀振清風
碁局落秋電雲陰愁濛鴻山路險犖确慎無告歸軒使
我數日惡羸驂逆歸心旋凜蹶霜灤悲嘶惜障泥短筇

冷難捉南征喜氣動迎面蛛絲落買網鱸金橙歸償炊
黍約

送張仲謀

竹雞相

一作爭

呼泥滑滑夜雨連明溪漲閣門前馬作遠

行嘶迺是張侯來訪別入門下馬未暖席猛如秋鷹

一作

集

欲飛掣黃花可浮惜別杯官沽苦酸不堪設張侯少

年氣高秀太華孤峯帶冰雪袖中日日有新詩正與秋
蟲同一律吏曹不能弄以事太尉家兒盡英慙窮愁寂

冥雙鳬縣唯子可輸肝膽說遊君宮室如芝蘭於我弟

兄比瓜葛相親更覺相去難

一作相從未覺歲時久

挽斷衫袖不

忍訣

一作言別奈何腸胃熱奈

緬懷君家方盛時廼翁屢把連城節

北使初隨富亳州萬死弗顧探虎穴煌煌忠槩獎王命

汝等于今仕朝列稍聞塞上秋草黃塘螂怒臂當車轍

將軍西擁十萬師謀士各伸三寸舌胡不還家讀父書

上疏論兵歟天闕燕然山石可磨鐫誰能禦子勒勲伐

功業未成且自愛早寄書來慰飢渴

擬君子法天運

君子法天運不言行四時提提無近功成歲乃可知名
窺秋毫端耳察穴蟻爭羣材極為力陰拱收視聽三辰
從昏明萬物安性命因時有更張斟酌如斗柄細人趨
眼前翻手覆手間狂風吹長林何枝鳥能安須臾誠快
意狼籍不可言

傷歌行四首

草木搖落天沉陰蟋蟀為我商聲吟高明從來畏鬼瞰

貧賤不能全孝心蚤知義利有輕重積羽何翅一鈎金
莫悲歸妹無錦繡但願教兒和瑟瑟

孟氏至誠通竹笋姜詩純孝感淵魚古人常欲養志意
君子不唯全髮膚有妹言歸奉箕箒仰誰出力助葭莩
等閒親鬢貧中白自悔從來色養疎

諸妹欲歸囊褚單值我薄宦多艱難為吏受賕恐得罪
啜菽飲水終無懼永懷遂休一夜夢誰與少緩百憂端
古人擇壻求過寡取婦豈為謀飢寒

伯夷不食周武粟程嬰可託趙氏孤死者復生欲無愧
受遺歸妹況在予經營百事失本意跬步尋常畏簡書
人間若有不稅地判盡筋力終年鋤

行行重行行贈別李之儀

行行重行行我有千里適親交愛此別勸我善眠食惟
君好懷抱高義動顏色贈子青琅玕結以永弗諼拭目
仰盛德洗心承妙言子道甚易行乃難忘虛名織
女星不能成文章微君好古學尚誰發予狂事親見不

足擇友知無方大聖急先務君其愛顏光外將周物情
中不敦已道以客從主人辨之苦不早行身居言前悟
理在意表苟能領斯會大自足諸小勿念一朝患勿忘
終身憂忠誠照屋漏萬物將自求此道不予欺實吾聞
之丘羣居行小慧宴笑奉樽俎益友來在門踈拙不見
取誰不聞此風去君鴻鵠舉

春思

花柳事權輿東風剛作惡啟明動鐘鼓睡著初不覺簡

書催秣馬行路如狗鐸看雲野思亂遇雨春衫薄今日
非昨日過眼若飛電光陰行晼晚吾事益落莫閒尋西
城道倚杖俯墟落村翁逢寒食士女飛綵索平生感節
物始悟身是客搔首念江南拏舫趁鷓鴣夷猶揮釣車
清波舉霜鯽黃塵化人衣此計誠已錯百年政如此豈
更待經歷

戲荅公益春思二首

能狂直湏狂會意自不惡蚤知筋力衰此事屬先覺公

詩應鍾律豈異趙人鐸我為折腰吏王役政敦薄文移
亂似麻期會急如電賦斂及逋逃十九被木索公思當
此時清興何由作前日東山歸花如萎莎落徑欲共公
狂知命知此樂公家胡蜀葵雖晚尚隱約晴明好天氣
暫對亦愜適糲恨朱粉輕舞憐衫袖窄衣襦相補紉天
吳亂鷓鴣草茅多奇士蓬華有秀色西施逐人眼稱心
最為得食魚誠可口何苦必魴鯽清狂力能否人生天
地客不者尚能來南窻理塵迹草玄續周書據策定漢

歷有意許見臨為公酤一石

昔人有真意政在無美惡微言見端緒垂手延後覺大
聲久輟響誰繼夫子鐸長笑二南間斯道公不薄性懷
如珮環詩筆若隕電前篇戲調公深井下短索子雲最
清淨亦動解嘲作光塵貴和同玉石尚磊落衆人開眼
眠公獨寤此樂昔在西宮遊初非朝夕約邂逅二三子
蛾眉能勸客坐嫌席間踈酒恨盞底窄驪駒我先返看
朱已成碧況聞公等醉歌舞恣所索舞餘必纏頭歌罷

皆舉白清狂稍稍出應節自不錯譬如觀俳優誰能不
一噓何為苦解紛廼似自立敵人生忽遠行車馬無歸
迹黃梁一炊頃夢盡百年歷弃置勿重陳虛心待三益
衆人觀俳優

衆人觀俳優誠有可笑時侏儒笑人後所笑動未知非
桀是堯舜諸生同一詞不能解其會何笑侏儒為桓公
方讀書輪扁釋斧鑿借問作書人已歸蒿里宅至精固
不傳所說乃糟粕使道如懷珎分我贍人貧人將遺朋

友誰不獻君親喁喁來噍食泯泯去游魂昭穆才弟兄
愚智已子孫愚游智者籠智受萬物役奔奔相後先成
則自為德勞神不知疲求所不能知深心著文字有如
鳥粘繭敗新為故袴何獨鄭人妻鵠卵待啄抱自憐非
荆雞誰能起千載化此故紙癡

次韻任公漸感梅花十五韻

花信風來自伊洛稍稍花光上林薄經年病骨怯輕寒
裁就春衫不勝著累累牆底卧虛樽醉鄉何處尋城郭

小軒假寐遊華胥萬籟無聲燈寂寞落梅新詩入吾手
驚起詩魔如發愕高文逸氣天馬趨尾端尚許青蠅託
坐恐勾芒弃我歸看花不及空紫萼生前常苦不自閑
芻豢縻人受羈絡我嗟卒歲敝鞍韉風敗衣裾塵滿橐
輕裘緩帶多公暇公獨奈何猶不樂公言少年豈易知
鳳屏翠幔愁蕭索蚤從琪樹折春飈每見新詩淚雙落
勸公且共飲此酒酒令雖嚴莫嗔虐時翻舞袖間清歌
日薦南尊羹北酪花開莫問醜與妍隨分眼前罄杯酌

不須憔悴減腰圍也學東陽沈侯約

荅王晦之見寄

臨西風動商歌故人別來少書信為問故人今若何白
雲濛濛迷少室明月耿耿照秋河可憐此月幾回缺空
城每見傷離別郵筒朝解得君詩讀罷涼飈奪炎熱嗟
乎晦之遣詞長於猛健故意淡而孤絕有如怒流雲山
三峽泉亂下龍山千里雪大宛天馬嘶青芻神俊照人
絕世無自言欲解羈銜去不能帖耳駕鹽車朝登商山

采三秀暮上緱嶺追雙鳬紛紛黃口爭粟粒君用此策
固未踈但恐高才必為一世用雖有潺湲不得釣空曠
不得鋤西風酌酒遙勸君好去齊飛鸞鳳羣窮山遠水
迺是我輩事荷鋤把釣聽子入青雲

寄懷藍六在延平

貧賤相知若吾友取端於此能更求德性委蛇結綠佩
文章璨爛珊瑚鈎與君千里共明月思子一日如三秋
願學延平兩龍劍風波際會永同遊

送焦浚明

西瞻岷山兮東望峨眉錦江清且漣漪地靈山秀誕豪傑
來入中州振羽儀相如傲萬物子雲窮一經黃金賣賦
聘私室白頭大夫不公卿窮閭卜肆間十步一豪英
竟無人識李仲元不可屈致嚴君平四君德音閉黃壤
只今壘頭松栢聲我住葉公城常如井底坐不謂焦夫
子聞風肯來過焦子初見我如蘭生幽林春風為披拂
始得香滿襟中懷坦夷眉宇靜外慕淡薄天機深花開

鳥啼書寂寂酒闌燭明夜沉沉人皆扶牽爛熳醉子更

把書求本心二年與燈火琢子之玉鍊我金焦夫子我以陋邦無人把書策邂逅逢君得三益胡為弃我忽遠行手捧嘉陽從事檄焦夫子君起為我舞我其為君歌君方跨馬涉遠道湖外地少山川多霜秋搖落天日遠西風翻翻水驚波一筵談笑遂相失兩地離愁各奈何焦夫子酒行君定起此盃須百分少別遂萬里歸尋所種樹應已數千尺試照嘉陽水君髮猶未白古人不朽

事所願更勉力別後相逢豈在言拭目看君進明德

新寨餞南歸客

初更月蝕缺半壁三更北風雪平屋夜寒置酒送歸客
長歌燕鴈燈前落故園無書已十月目極千里雲水隔
客方有行乃未已歸且經予江上宅比隣諸老應相問
為道於今不如昔新知翻手覆手間故人江南與江北
有時日高天氣清炙背南軒把書策可憐斯人巧言語
今已埋沒黃土陌乃知生前傾意氣不用身後書竹帛

往在江南最少年萬事過眼如鳥翼夜行南山看射虎
失脚墜入崖底黑却攀荆棘上平田何曾悔念身可惜
辭家上馬不反顧談笑據鞍似無敵邇來多病足憂虞
平地進寸退數尺意氣索然成老翁所有鬢髮猶未白
閒居為婦執薪爨宿處野人爭卧席昔壯今衰殆不如
吾恐未必不為福寄聲諸老善自愛客行努力更强食
門前種柳今幾長戒兒勿令打鷓鴣不晚歸來躑躅間
為公置酒臨江閣

曉起臨汝

缺月欲崢嶸鳴雞有期信
征人催夙駕客夢未渠盡
野荒多斷橋河凍無裂疊
羸馬踏冰翻疑狐觸林遁
清風蕩初日喬木轉幽韻
崧高忽在眼岌岌臨數郡
玄雲默垂空意有萬里潤
寒暗不成雨卷懷就膚寸
觀象思古人動靜配天運
物來斯一時無得乃至順
涼喧但循環用捨誰喜愠
安得忘言者與講齊物論

荅閻求仁

暮天携手步河梁把酒淹留斜日光生當有別各異方
古人嗟此樂難當大梁嬉遊少年場春風花枝轉鸝黃
節物謝徂歲渠央來自江南登君堂秋氣欲動聞寒螿
會幾何日今別長與子觀化言兩忘浩歌放船入莽蒼
綠藻刺眼紅蕖香湖月夜飛衣袂涼相從宴坐歌胡床
贈言錦繡邀報章君心溫良志則剛不能牛下學歌商
欲謝世紛自翱翔果行此策無乃良昔人所學浩渺茫
海涵地負無抵當弃捐及人其粃糠帝王之功一毫芒

既趨世故自遐遑何異滅穀俱亡羊以生隨之中道傷
止吾已知終必亡我亦聞之未能行慨今無策可伏藏
身隨衣食葉南陽脫身自當及康強不待齒踈髮蒼浪
優游濠上如惠莊論文莫逆與子相

送陳季常歸洛

人生俱行役何能如聚鹿浮楂在江湖邂逅一相觸天
邊數年別故人有陳叔誰云區區葉車馬肯來辱清樽
聽夜語常爇音謝三四燭劇談連古今天漢瀉崖谷高

燭貌

材歎加壯所向動乖俗我官塵土間強折腰不曲飽飯
逐人行君來方拭目汝穎無奇士僕夫催結束嗟如秋
窻暉來少去苦速蚤吾接雍容愛德心不足歲晚託懿
親清義廼愈篤落日送河梁鳴蟬度喬木歲寒贈君何
唯有南溪竹

雨晴過石塘留宿贈大中供奉

長虹垂地若篆字晴岫插天如畫屏耕夫荷鋤解襪襖
漁父晒網投苓箸子期聞笛正懷舊車胤當窻方聚螢

獨卧蕭齋已無月夜深猶聽讀書聲

次韻荅薛樂道

薛侯筆如椽崢嶸來索敵出門決一戰莫見旗鼓迹令
嚴初不動帳下聞吹笛乍奔水上軍拔幟入趙壁長驅
劇崩摧百萬俱辟易子於風雅間信矣强有力天材如
升斗吾恨付與窄攬物能微吟假借少儲積山城坐井
底聞見更苦僻子非知音耶何不指瑕謫

戲贈陳季張

氣清語不凡郭與陳季優季子有美質明月懸高秋詞

談貫百家炙轂出膏油放聲寄大塊肆情無去留方圓

信自爾規矩為瘡疣當其說荒唐衆口莫能咻書案鼠

篆塵銜蔬滿床頭居不省家舍那問犬馬牛吾嘗觀聖

人與世為獻酬道通衆人行智欲萬物周微言觀季子

頗亦有意不季子捧腹笑吾豈措紳囚我將乘扶搖南

與大鵬遊相羊九萬里厭則下滄洲黃子失所荅如耕

不能耰井蛙延海鼈樂事擅一丘束牲盟伯夷固自取

擲揄

音由

無心以觸物愛子如虛舟維楫苟不存傾覆當

誰尤尚思濟來者非但自為謀

寄別陳氏妹

西風吹天雲頃刻異秦越叔子從天東忽與同姓別
餞行在半塗一食三四噎遙遙馬嘶斷芳草迷車轍引襟
滿眼淚回首寸心折母氏孝且慈愛養數毛髮諸兒恩
至均如指孰可斲汝今始歸人綿綿比爪𨾏中畦不灌
溉芳意還銷歇黃鳥止桑楚南山采薇蕨擇歸既甚明

寡取廼為悅我開賢女傳須已為汝說在宋有伯姬潔
身若冰雪下堂失傳母上堂就焚爇吾嘗嘉惠康有婦
皆明哲戮力事耦耕甘貧至同穴彼於視三公其猶吹
一吷雍容二南間此婦真豪傑男兒何有哉今壯而嬪
老逢時秉釣軸邂逅把旄鉞富貴多禍憂朋黨相媒孽
等之穀中遊巧者未如拙勿以貧賤故事人不盡節母
儀尊聖善婦道尚曲折葛生晚萋萋締綌代裘褐女工
既有餘枕簟清煩暍誰言淮蔡遠曾不以日月跂予升

高丘佇望飛鳥滅善懷詩所歌行矣勿惜別皇皇太史
筆期汝書英烈

戲贈王晦之

故人邇在登封居折腰從事意何如月明曾聽吹笙否
我亦未見緱山鳬棲苴世上風波惡情知不似田園樂
未知嵩陽禪老之一言何似黃石仙翁之三畧

觀崇德墨竹歌

并序

姨母崇德君贈新墨竹圖且令作歌

夜來北風元自小何事吹折青琅玕數枝灑落高堂上

敗葉蕭蕭煙景寒廼是神工妙手欲自試襲取天巧不

作難行看歎息手摩拂落勢天矯墨未乾徃徃塵晦碧

紗籠伊人或用姓名通未必全收俊偉功有能事便白

首不免身為老畫工豈如崇德君學有古人風揮毫李

衛讓神筆

衛夫人尚書郎李充母也
以夫姓自稱李衛

彈琴蔡琰方入室道

韞九歲能論詩龍女早年先悟佛奕碁樵客腐柯還吹

笙仙子下緱山更能遇物寫形似落筆不待施青丹尤

知賞異老蒼節獨與長松凌歲寒世俗寧知真與偽揮
霍紛紜鬼神事黃塵汙眼輕白日卷軸無人得覘視見
我好吟愛畫勝他人直謂子美當前身贈圖索歌追故
事才薄豈易終斯文所愛子猷發嘉興不可一日無此
君吾家書齋符青壁手種蒼琅十數百一官偶仕葉公
城道遠莫致心慘戚我方得此興不孤造次卷置隨琴
書思歸才有故園夢便可呼兒開此圖

送陳蕭縣

欲留君以陳遵投轄之飲不如送君以陶令無絃之琴

酒嫌別後風吹醒琴為無絃方見心去夏雨餘清夜醉
黃鸝不覺報春深花枝柳色競鮮好迺是前日枯朽林
人生用捨四時可壯士憔悴非獨今大夫黃綬領垂素
二十餘年走塵土盈車載書遣兒讀不悔早為文墨誤
治聲翕然先向東古蕭子國今萬戶德性忠純吏不欺
閨門孝友民所慕麥隴童兒憐雉乳冰天窮子兼襦袴
悵悵琴意如溫風迺知不必徽絃具明月清河佳可遊

官倉縻我不得去白露為霜水一篙秋香蓮蕩浮輕舸
此中亦有無絃意相憶樽前把蟹螯

致政王殿丞逍遙亭

漆園著書五十二致意最在逍遙游後來作者逐音響
百一未必知莊周幽人往往泥出處俗士不可與莊語
逍遙如何一蛇一龍以無為有當以守雌為雄與物無
對無內無外與民成功有闕有對左肘生楊觀物化右
臂為雞即時夜果若乘氣有待游如何六氣無窮謝天

之蒼蒼非正色道真微妙安可得利害叢中火甚多此
心寂寞誰能識文人春秋誠未高視聽聰明齒牙牢所
為淳拙有深越持置酷似巨山陶平生剛直折不得目
送飛鴻向賓客早束衣冠林底眠非關暮年俗眼白種
田百畝初為酒買地一區今有宅家人歲計不嬰心兩
兒長不能措畫邇來信已不問天萬事逍遙只眼前何
必讀書始曉事此翁暗合莊生意

送何君庸上贛石

醉中作

臘梅開盡欲凋年
痛飲千江壁底眠
江寒山瘦思親友
歸守平生二頃田
西昌萬戶深篁竹
楚國無人知白玉
欲附絃歌慰寂寥
絃斷枯桐誰識曲
樽前顧曲客姓周
學問東山繼先流
梅花惱人已落盡
真成何遜醉揚州
我今頷底髭半白
背世

闕

學春秋此書百年鎖蛛網

亦謂歲晚逢何休
荀侯畫謀取垂棘
之奇貪賢無處適
大庾嶺頭煙雨中
萬峰插天如劒直
苦懷行李冰繞須
野店酒旗可試沽
只今人才不易得
儻逢滌器識相如

寄懷趙正夫奉議

春皇撫宇宙仁氣被園林草木懷元寵松柏抱常心攬
觀萬物表有覺詠時禽一勸君沽酒一起子投簪小人
畏罪罟深雪奉官箴雞鳴風雨晦鶴鳴澗谷陰維此方
寸寶日月所照臨澤蒲漸綠弱山桃破紅深永懷寂寞
人黃卷事幽尋虛窻馳野馬宴坐醉古今鴛鴦求好匹
笙磬和同音何時聞笑語清夜對橫琴

四月丁卯對雨寄趙正夫

公家常忽務退食用寢訛相思雖勞勤書問不能多時
雨光萬物開雲見義和乾坤有美意畎澮未盈科凱風
吹南榮官槐綠婆娑鷓鴣將其匹來巢自成家於物無
譏嫌人亦不誰何眷言生理拙無地牧雞鵝丈人春秋
高雛鵲勤摩挲在公每懷歸安得借明駝畏塗失无鄉
酌海持一螭平生朱絲繩寂寞長絲窠故人疊疊去宰
木上女蘿生存半白首會面阻山河趙侯秉金玉不與
世同波從容覺差晚鄙心寄琢磨外物良難必歲寒不

欽定四庫全書

山谷外集
卷十一

改柯

山谷外集卷十一

四十一

謹案第二十頁後一行恐是非特未定也刊本特訛時據宋詩鈔改

第二十五頁後四行仰誰出力助葭葦刊本葭訛兼據別本改

第四十頁前三行樽前顧曲客姓周刊本顧訛頃據別本改





總校官庶吉士臣張能照

校對官中書臣張九鐔

謄錄監生臣陳炳

欽定四庫全書薈要

集部

山谷外集卷十二

詳校官助教臣謝登雋



欽定四庫全書薈要卷一萬五千一百八十三

集部

山谷外集卷十二

宋 黃庭堅 撰

古詩八十二首

賦陳季張北軒杏花

得酒字

送蒲元禮南歸

即席

贈李彥深

再和答張仲謀陳純益兄弟

飲城南即事

宣九家賦雪



和荅舍弟中秋月

和世弼中秋詠懷

次韻荅常甫世弼二君不利秋官鬱鬱初不平
故予詩多及君子處得失事

送魏君俞知宿遷

秋懷二首

和李文伯暑時五首

送錢一杲卿

觀道二篇

送朱貺中允宰宋城

送醇父歸蔡

次韻七兄青陽驛西阻水見寄

酌別世弼

庭誨惠鉅硯

叔誨宿邀湖上之遊以故不果往

次韻子真會靈源廟下池亭

幾復讀莊子戲贈

次韻坦夫見惠長句

奉和慎思寺丞

次韻晉之五丈賞壓沙寺梨花

答王道濟寺丞觀許道寧山水圖

觀王熙叔唐本草書歌
擬古雜言

古豪俠行贈魏鄰幾

拘士笑大方

擬古樂府長相思寄黃幾復

古樂府白紵四時歌四首

韓信

淮陰侯

顏闔

贈希孝

侯元功問講學之意

戲贈張叔甫

集句

以右軍書數種贈丘十四

李君貺借示其祖西臺學士草聖并書帖一編

二軸以詩還之

三至堂

玉照泉

延壽寺僧小軒極蕭灑予為名曰林樂取莊生
所謂林樂而無形者并為賦詩

吉老許惠李北海石室碑以詩及之

吉老兩和示戲答

題羅山人覽輝樓

古風寄周元翁

西禪聽戴道士彈琴

題安石榴雙葉

絕句

題虔州東禪圓照師新作御書閣

送權郡孫承議歸宜春 戲題

戊午夜宿寶石寺視寶石戲題

戲題承天寺法堂前栢

陳吉老縣丞同知命弟游青原戲作百家衣

同吉老飲清平戲作集句

效孔文舉贈柳聖功三首

六言

藥名詩奉送楊十三子問省親清江

次韻舍弟喜雨

答何君表感古冢

會稽竹萌為蘄春傅尉作

還深父同年兄詩卷

次韻答宗汝為初夏見寄

答周德夫見寄

招隱寄李元中

送晁道夫叔姪

戲贈潘供奉

次韻惜范生

和晁仲觀試進士

賦陳季張北軒杏花

得酒字

青春不揀勢薄厚春到人家盡花柳杏園主人殊未來
豈謂一枝先入手天晴日暖籠紫烟鏡裏紅粧猶帶酒
江梅已盡桃李遲此時此花即吾友欄邊漸雨一作滿枝

上空歎息躊躇為之久榮衰何異人一生少壯暫時成
老醜狂癡未解惜光陰不飲十人常八九豈如大醉升
糟丘太古乾坤隨處有更當種子如董仙博米誰能問

升斗

董奉事見葛洪神仙傳

送蒲元禮南歸

元禮佳少年俊氣欲無敵文章詩最豪溟漲助筆力三
年葉公城於我固多益恨無荆鷄材使君有羽翼此行
省親闈綵服耀春色從容文字間固未曠子職蘄春向
鄂渚曾不三四驛吾師李武昌金聲而玉德誠能勇一
往所進豈寸尺江南後生秀居多門下客願君從之遊
琢磨就圭璧斗酒清夜闌缺月挂屋壁雞鳴馬就轡少
別安足惜人生共一世誰能無行役

即席

落葉不勝掃月明樹陰踈親鄰二三子樽酒相與俱霜
栗剝寒橐晚菰煮青蔬解官方就門敦薄無簡書純益
氣蕭蕭未羈天馬駒元禮喜作詩豪氣小未除大薛知
力學日來反三隅小薛受善言如以柳貫魚天民嘗逸
駕近稍就櫪株知命雖畸人清談頗有餘阿盧快犢子
規矩尚小殊不材於用少我則澗底樗會合只偶然等
閒異秦吳人生一世間何異樂出虛過耳莫省領披懷
使恢踈買網尚可鱸倒壺更遣沽不當愛一醉倒倩路

人扶

贈李彥深

瓊枝雖療渴萱草忘人憂
李君氣蕭蕭翠竹搖清秋
步竹來過門日色在簾鉤
開雲覩白雉臨水對虛舟
言少常造極色夷似無求
醉尉廳索寞寒泉沃茶甌
四坐愁水厄井餅糲屢投
斲錫碎玉札間薦當衆羞
微物不足貴且延君少留
行役阻相見心如旆悠悠
春魚出清潭社酒欲勝筍
時來得晤語呼客盡更籌

再和答張仲謀陳純益兄弟

渡江羈宦襄江北紅塵染盡春衫色春畝輟耕草萋萋
瘦妻病餘廢組織官倉得粟何常飽清夜饑腸吟唧唧
西風吹夢到故鄉千里關山雲水白可憐奪却田園樂
何異萬金輸一擲亂轍曾無長者車經年不造先生席
張侯少年二陳俊傾盖能如舊相識涼秋夏日數來過
要與六經生羽翼貧家雖無樽酒懽小徑曾鉏待三益
劇談莫問井闌干坐湏山月吐半壁

飲城南即事

陰陰花柳一百五吹空白綿亂紅雨已看燕子飛入簾
未有黃鶯學人語闌雞走狗輕薄兒衣裾相鮮氣相許
半是墻間醉飽人還家驕色羞婦女顧侯邀客出城南
曉蹋天街已塵土春風遊絲人到狂何況客醉日當午
著作文章名譽早不愧漢庭御史祖元城茂宰民父母
境不飛蝗河渡虎何侯家世看豐碑墨摹萬卷心奇古
穎陰從事江左賢八詠樓高風月苦劉郎曾眠武陵源

好在桃花迷處所鄙夫漫有腹便便懶書欲眠誰比數
一笑相懽自難得看朱成碧更起舞任他小兒拍手笑
插花走馬及嚴鼓顧侯三酌似已多明日花飛奈老何
宣九家賦雪

都城窮臘月半破晚來雪雲應朝課虛簷稍聞飄瓦聲
六花連空若推墮翩翩恐逐歌吹來皎皎不受塵泥浣
試尋高處望雙闕佳氣葱葱寒貼安遙知萬馬駕紫宸
把燭天街聽宮鐸吾人豈解占豐年但喜酒樽宜附火

石鼎香浮北焙茶。洪爐殼爆宣城果。陸珍海異厭下筋。
別索百種煩烹和。僕奴睥睨費呼叱。主人愛客無不可。
頻向江船問子猷。山陰夜醉何如我。北鄰長吉最能詩。
怯寒正想重裘坐。故遣長須屢送來。猶得王孫嘲飯顆。

和舍弟中秋月

高秋搖落四十五。清都早霜凋桂叢。纖塵不隔四維淨。
寒光獨照萬象中。少年氣與節物競。詩豪酒聖難爭鋒。
桓伊老驥思千里。尚能三弄當清風。廣文陋儒嬾於事。

浩歌不眠倚梧桐百憂生火作內熱何時心與此月同
後生晚出不勉學從漢至今無揚雄天馬權竒大宛種
吾家阿熊風骨聳言詩已出靈運前行身未聞孟軻勇
明憲文字不取讀蜘蛛結網塵堆壅少壯幾時夏已秋
待而成人吾木拱憐汝起予秋月篇我哀安得筆如椽
但使樽中常有酒不辭坐上更無氈把詩問字為汝說
便當侯家歌舞筵

和世弼中秋月詠懷

一年中秋最明月也照貧家門戶來清光適從人意滿
壺觴政為詩社開秋空高明萬物靜此時乃見天地性
廣文官舍非吏曹況得數子發嘉興千古風流有詩在
百憂坐忘知酒聖露華侵衣寒耿耿絕勝永夏處深甌
人生此歡良獨難夜如何其看斗柄王甥俊氣橫九州
樽前為予商聲謳松煙灑落成珠玉溪藤卷舒爛銀鈎
北門樓鹵地險壯金堤濁河天上流離宮殿閣礙飛鳥
霸業池臺連禿鶩當日西園湛清夜冠蓋追隨皆貴游

使臣詞句高突兀慷慨悲壯如曹劉我於人間觸事懶
身世江湖一白鷗空餘詩酒興不淺尚能呻吟卧糟丘
偶然青衫五斗米奪去黃柑千戶侯永懷丹楓樹微脫
洞庭瀟湘晚風休晴波上下掛明鏡棹歌放船空際浮
不須乞靈向沈謝清興自與耳目謀江山於人端有助
君不見至今宋玉傳悲秋期君異時明月夜把酒岳陽
黃鶴樓

次韻答常甫世弼二君不利秋官鬱鬱初不平故

予詩多及君子處得失事

鵬翼將圖南垂天上扶搖飛飛尋常間深樹乘風蜩大
觀與小智從事不同條揚雄老執戟金張珥漢貂松栢
有本心蒲柳望秋凋久矣結舌瘖狂言始今朝崔王兩
驥子神俊萬里超驚人吐嘉句拔俗振高標頻來草玄
宅共語清入寥處已願如舜致君敢不堯回觀勢利場
內熱作驚潮趨時愧才全傲世迺士驕二生浪許可彈
炙則求鴟園棊飯後約喂栗夜深邀爾來數到門玉趾

不憚遙相期淡薄處行樂亦云聊甘泉沸午鼎茗椀方
屢澆昏鴉相送歸風枝撼調調男兒強飲食九鼎等一
瓢富貴但暫熱名聲適為妖世事寒暑耳四時旋斗杓
勿學懷沙賦離魂不可招

送魏君俞知宿遷

魏侯得名能治劇江湖作吏聲籍籍人言才似鉅鹿公
詔書擢守二千石前日見賢後得罪艾封霑襟復自悔
牛刀割雞不作難看公來上宿遷最

秋懷二首

秋陰細細壓茅堂吟虫啾啾昨夜涼雨開芭蕉新間舊
風撼簷簷宮應商砧聲已急不可緩簷景既短難為長
狐裘斷縫棄牆角豈念晏歲多繁霜

茅堂索索秋風發行遶空庭紫苔滑蛙號池上晚來雨
鵲轉南枝夜深月翻手覆手不可期一死一生交道絕
湖水無端浸白雲故人書斷孤鴻沒

和李文伯暑時五首

扇

團扇如明月動搖微風興屏去坐上熱祛逐盤中蠅有
用荷提挈無心分愛憎炎炎雖可貴棄置奈寒冰

麈尾

麈髦副白玉揮弄柔毳毳不獨效擊拂與君為指南諸
生臨廣坐辯口劇春蠶此物為解紛吾常見不談

石枕

沈埋寒泉骨成器世乃重賢於曲肱樂輾轉不傾動六

月塵埃間頭為滲滲痛一卧洗煩勞華音直通夢

蘄簞

吾家笛竹簞舊物最所惜當年楚山秋林下千金得寒
光不染著夏與塵泥隔落日照江波依稀比顏色

葛幘

飛蚊遠床帷來傍青燈集微涼忽透隙如帶驚雷入念
彼無幘者中夜何嘆及天下同安眠西風向秋急

送錢一杲卿

錢君佳少年濯濯春月柳開談屢逼人落筆若揮帚
鴈孤蒲中英材頗時有同聲傾夙期異姓接婚友冷官
國北門會面始八九時時過薄飯郊坐常至酉今日得
休沐方醺步兵酒聞子車馬南欲餞輒掣肘溫風媚行
色綠淨無塵垢魚軒迎少婦能獻二親壽到家春已融
柔條可結紐淩藻蔓平湖釣船先入手南鴈正北來蚤
寄詩千首

觀道二篇

聖人用仁心惻傷路傍兒虎狼舐血自哺胃與肌同
在天地間六鑿相識知父母臨萬物大道甚坦夷百年
修不善一日許知非虎狼有恠心還與聖人齊

庶蘭向千載凜凜苦生者曹李雖無恙如沉九泉下短
長略百年共是過隙馬事來磨其鋒意氣要傾瀉風雲
滅湏臾草木但春夏唯此一物靈不可藉外假譽髦天
下才西伯本心化君無誚斯文可以觀大雅

送朱貺中允宰宋城

鄴王臺邊春一空但有雪飛楊柳風我從南陽解歸橐
重簾複幕坐學宮酒材苦責公釀薄欲經醉鄉無路通
奈何當此意緒惡僚友決去如飛鴻朱侯官居鄴城下
不脫轡銜秣征馬綠槐陰陰門對街唯我知君少閒暇
新從天上拜書回去効割雞宋之野宋城萬家有和氣
明府豈弟心傾寫愧君乞言極忠厚安得瓊瑤贈盈把
古來為縣有盛名不遛墾田歸桑柘欲蘓濁水潁尾魚
舞文吏胥無假借朝廷本意在治安外論不然可驚喑

豈如規模跨三代首聽官師困鰥寡簿書期會可半功
區別枉直教刑中杜光作刑至載割及民無辜受笞罵
權衡此心坐堂與草木遂生蟲蟻化朱侯明日君定行
行李觸熱時已夏我官雀鼠盜太倉欲去猶須畢婚嫁
幾時可上君政成即買扁舟極東下

送醇父歸蔡

北風飄飄天作惡枯林已無葉可落寒溪濺濺聲迫人
歲聿云莫慘不樂此時陳子廼棄我歸將索綯亟乘屋

吾室尚潭潭留君欲晤談掉頭去不顧明發解征驂君
來久相從知我無所堪好學勇如虎讀書青出藍有疑
必考擊無與不窮探愧無洪鐘響十不答二三慨予方
食貧予腹豈屢厭藜羹稀糝芼寒蕝薄醢鹽雖欲苦留
君俎豆無加添從來婚友間恩義亦云蕪草枯方兀兀
麥秀待漸漸綠髮佳少年回首垂白髯進德失盛時時
寧為人淹經綸自封植豈不如春蠶此行決矣戒童僕
歸旁南陔采蘭菊旅床夜夜悲蛩蛩行色村中異風俗

青燈白酒留故人莫愛一醉至曉角

次韻七兄青陽驛西阻水見寄

挽船逆牽九牛尾寸步闕梁論萬里淮山終日只對面
與船低昂如角抵水工爬涉未曾去遠者盈尋近盈咫
長堤夜射千丈潭疾雷不及先掩耳吾人猶困坎井泥
何算鯉鰕著塵滓我家詩翁坐長歌險阻艱難實經履
稍尋牛豕畦曠行始得邛落魚菜市風榆雨柳愁殺人
日西月東若流水忽然槌鼓催發船入門驩甚折屐齒

道逢耦耕試借問徃徃見謂知津矣十年奔走營曉炊
家居煥席能得幾此行幹蠱維叔父功苦食辛等醇醴
官筒之詩鄴城下孝友懇惻見表裏強哦竹間惜寡和
如以罷兵取堅壘何當車馬城南來壽親一樽開宴喜
酌別世弼

王郎婚友平生期學問文章過吾黨一見懸知白壁奇
三年未負青雲賞蘓秦六印自多金陶朱再相宜藏鏹
貧賤相知乃為貴功名所在何須枉鄴王城下倒清樽

子雲書中羃蛛網樽前惜別語萬千門外催發人三兩
自從相見開青眼無處會面如天上傾壺倒榼駐車馬
豈但呼燈照鬢旒平生相從忘歲月手足割裂誠迷惘
譬如旁人看疥癩未易能去膚髮痒但願自思恩愛間
勿以眼前劇愁想

庭誨惠鉅硯

郭君大硯如南溟化我霜毫作鵬翼安得剡藤三千尺
書九萬字無渴墨

叔誨宿邀湖上之遊以故不果往

芰荷採盡荇田田湖光價當酒十千主人邀客殊未來
西風枕簟廢書眠睡罷書窓翻墨汁龍蛇起陸雲雨濕
晚筵紅袖勸傾盃公榮坐遠酌不及章臺柳色未知秋
折與行人鞭紫騮金城手種亦如此今日搖落令人愁
雙飛鴛鴦一朝隻春鉏欲匹畏白鷗風標公子誠自多
波淨月明如鴟何

次韻子真會靈源廟下池亭

繫馬著堤柳置酒臨魏城人賢心故樂地曠眼為明十
年風煙散邂逅集此亭悲歡更世故談話及平生折腰
督郵前勉強不見情世味曾淡薄心源留粹精晴雲有
高意濶水無湍聲誰言王安豐定識阮東平

幾復讀莊子戲贈

蜩化槍榆枋鵬化搏扶搖大椿萬歲壽糞英不重朝有
待與無待定非各逍遙譬如宿舂糧所詣豈得遼漆園
槁項翁聞風獨參寥物情本不齊顯者桀與堯烈風號

萬竅雜然吹簾簫聲隨器形異安可一律調何嘗用吾
私揔領使同條惜哉向郭誤斯文晚未昭胡不棄影事
直以神理超本資不才生鴈得不才死投身死生中未
可優劣比深藏無所用一寓不得已逍遙同我誰歲莫
吾與子

次韻坦夫見惠長句

溫風撩人隨處去欲如羶羊蟻旋幕落英馬前高下飛
牽挽一作引挽忽與樽酒遇令行如水萬夫長傾蓋不減平

生故素衣成緇面鰲黑笑說塵沙工點汙王事賢勞尚
有詩自卷溪藤染霜兔桃李清陰坐未移走送雄篇疲
健步張侯先不露文章十年深深豹藏霧歛來聽訟小
棠陰千里鳴弦舞韶護我名最落諸人後頓使漂山由
衆煦伐木丁丁愧友聲食草啣懷野聚谷陽舊壘一
片春勤我引領西南情遙知紅紫能亂眼錦衾作夢高
唐賦簡書留拘四十里夢魂明明識歸路公才富比滄
海宮明珠珊瑚凡幾庫惠連宰上麥纖纖

予早與仲和游仲和才高

秀
喜公猶得春草句明朝折柳作馬箠想見杯盤咄嗟
具風光暫來不供翫大似橫塘過飛鷺甕面浮蛆暖更
多氣味煩公卒調護樹頭樹底勸提壺南岡北岡教脫
袴春衣可著慳醉眠急觴催傳莫論數

奉和慎思寺丞太康傳舍相逢并寄扶溝程太丞
尉氏孫著作二十韻

扶亭大夫伯淳父平生執鞭所欣慕蚤年學問多東南
形阻江山想神遇阮籍臺邊有一人愛歎非為婚姻故

民言令君明且清玉壺寒冰不受污我從王事驅傳馬
落日東走駭麇兔問知鄰境欲過之簡書有程嚴寸步
曾懷作惡無處說天氣昏昏月含霧故人如從空中落
逼耳好鳥鳴韶護野桃窈窕風剪拂官柳低昂春燠煦
政由人好景亦好燒燭續書笑言聚同懷兩賢孤此樂
無物可寫心傾縻鄧侯詩成錦繡段浣花屑玉邀我賦
今年病起踈酒盃醉鄉荆棘歸無路詩窮淨欲四壁立
奈何可當杜武庫不似灞橋風雪中半臂騎驢得佳句

濟時之材吾豈敢樗櫟初無廊廟具上車不落強顏耳
伏食官倉等雞鶩只欲苦留公把酒都畿千里勤督護
及得歸時穀雨餘已剪輕衣換袍袴春色哀從一片飛
况廼紛紛不知數

次韻晉之五丈賞壓沙寺梨花

沙頭十日春當日誰手種風飄香未改雪壓枝自重看
花思食實知味少人共霜降百工休把酒約寬縱

答王道濟寺丞觀許道寧山水圖

往逢醉許在長安，蠻溪大硯磨松煙。忽呼絹素翻硯水，
久不下筆或經年。一日踏門撼門鈕，巾帽歌斜猶索酒。
舉杯意氣欲翻盆，倒卧虛樽將八九。醉拈枯筆墨淋漓，
勢若山崩不停手。數尺江山萬里遙，滿堂風物冷蕭蕭。
山僧歸寺童子後，漁伯欲渡行人招。先君笑指溪上宅，
盧鵝白鷺如相識。許生再拜謝不能，迺是天機非筆力。
自陳精力初未衰，八幅生絹作四時。蚤師李成最得意，
什襲自藏人已知。貴人取去棄牆角，流落幾姓知今誰。

大梁畫肆閱水墨四圖宛然當物色自言早過許史門
常賣一聲儻然得雨雪泠泠滿寺庭四圖冷落讓丹青
往來睥睨誰比數十萬訓之觀者驚客還次第閱春夏
坐見歲序寒崢嶸王丞來觀嘆唧唧亦如我昔初見日
新詩雌黃多得實信知君家有摩詰我持此圖二十年
眼見綠髮皆華顛許生縮手入黃泉衆史弄筆摩青天
君家枯松出老瞿頗似破屏有骨骼一時所棄願愛惜
不誣方將有人識

觀王熙叔唐本草書歌

少時草聖學鍾王意氣欲齊韋與張家藏古本數十百
千竒萬恠常搜索今得君家一卷書始覺辛勤摠無益
移燈近前拭眼看精神高秀非人力北風古樹折巔崖
蒼煙寒藤掛絕壁逸氣崢嶸馳萬馬隻字千金不當價
思初槃礴落筆時毫端已與心機化主人知是希世竒
但見姓氏無標題自非高閑懷素不能此何必更辨當
年誰

擬古雜言

鴈鴈隨春風過鄉縣烟雨昏行不亂同安樂共憂患雲
重重不相見日昃晡下平湖十五五依黃蘆得粒不
啄鳴相呼新婦見鴈懷征夫上堂曳裙裾四拜啓阿姑
一作下堂勞苦人言鴈寄書審能寄書無阿姑語新婦
鴈上堂問阿姑

古來無此事今安得此語新婦祝鴈好自去勿學水中
戀涔魚寄汝尺素上有書塞北春寒用當襦寄書與阿
誰我家蘇校尉海上牧羊兒為言妾能事君母勿負漢

恩作降虜

古豪俠行贈魏鄰幾

翩翩魏公子恐是信陵君
高義動哀俗孤標對層雲
風吹棠棣花一枝落夷門
俯仰少顏色蕭蕭煙景昏
已朽朱亥骨侯嬴無子孫
衆中氣軒昂把臂論肺肝
沃之紅鸚鵡載以烏賀蘭
門前馬嘶急我弟忽扣關
謂言空中落逆旅有仁人
老母一解顏萬金難報恩
琅玕廼未贈交好如弟兄

拘士笑大方

拘士笑大方俗吏縛文律當其擅私智轍覆千里失鳥
飛與魚潛明哲善因物欣然領斯會千百無十一蒯緱
裝太阿付騶斬芻秣風雨晦冥時中夜鳴不歇張公下
世久安得歎埋沒齊王好吹竽楚客善鼓瑟衛婦新上
車戒御無咎服教母滅竈火徙薪始入室三言至丁寧
於理蓋已密主人皆笑之廼在未適節莊生亦有言外
物不可必無地與揮斤眷然思郢質

擬古樂府長相思寄黃幾復

江南江北春水長中有一人遙相望字曰金蘭服衆芳
妙歌揚聲傾滿堂滿堂動色不入耳四海知音能有幾
惟予與汝交莫逆心期那間千萬里欲憑綠水之雙魚
為寄腹中之素書溪回嶼轉恐失路夜半不眠起躊躇
古樂府白紵四時歌

桃李欲開

一作
在時

風雨多籠絃束管奈春何

一作闕鏤管
絃絕經過

風休雨靜花滿地

一作落花著
地深一尺

時節去我如驚波

一作
安用

風日更妍和

少年志願

一作燕燕作巢

不成就日月星辰後昏晝

一作

故年主人且恩舊

俟河之清未有期

一作及河之清八月來

斗酒聊為社

公壽

日晴桑葉

一作桑桑日長

綠宛宛春蠶忽忽都成繭繰車宛轉

頭緒多相思如此心亂何少年志願

一作燕燕作巢

不成就故

年主人且恩舊及河之清八月來斗酒聊為社公壽

絡緯驚秋鳴

一作草根風寒蟲

唧唧美人停

一作張

燈中夜

一作夜半

織回文中有白頭吟人生難得相知心少年志願

一作燕燕

巢作 不成就故年主人且恩舊及河之清八月來斗酒聊

為社公壽

北風降霜松栢彫

一作休

天形慘澹

一作濯瘦

光景銷

一作愁

山

河夜半失故處

一作水底長河日夜流

何地藏舟無動搖

一作美人贈我狐白

裘

少年志願

一作燕燕作巢

不成就故年主人且恩舊及河之

清八月來斗酒聊為社公壽

韓信

為黃幾復作

韓生高材跨一世劉項存亡翻手耳終然不忍負沛公

頗似從容得天意成臯日夜望救兵取齊自重身已輕
躡足封王能早寤豈恨淮陰食千戶雖知天下有所歸
獨憐身與噲等齊蒯通狂說不足撼陳豨孺子胡能為
予嘗貰酒淮陰市韓信廟前木十圍千年事與浮雲去
想見留侯決是非丈夫出身佐明主用舍行藏可自知
功名邂逅軒天地萬事當觀失意時

淮陰侯

韓生沈鷺非悍勇笑出跨下良自重滕公不斬世未知

蕭相自追王始用成安書生自聖賢左仁右聖兵在咽
萬人背水亦書意獨駢市井收萬全功成廣武坐東向
人言將軍真漢將免死狗烹姑置之此事已足千年垂
君不見丞相商君用秦國平生趙良頭雪白

顏闔

顏闔無事人躬耕自衣食翩翩魯公子要我從事役輶
軒來在門駟馬先拱壁出門應使者隴上不謀國心知
誤將命非敢憚行役使人返錫命戶庭空履跡中隨衛

侯書起作太子客誰能明吾心君子遽伯玉

贈希孝

金玉雖滿堂一去誰能守石交千秋期程嬰報杵臼絲
隨丹青染變態非復舊竹杖寒蒼蒼草木黃落後匏從
曲沃來管是汶陽有土性本高明天材更渾厚革之成
國器實假匠伯手木平非斧斤是事公信否

侯元功問講學之意

金聲而玉振從本有聖學古師所未講赤子有先覺絲

直則為絃可射可以樂竹笋不成蘆白珪元抱璞匏瓜
不能匏其香猶為匏土俗頗暖妹西笑長安樂革無五
聲材終然應宮角木人得郢工鼻端乃可斲

戲贈張叔甫

集句

團扇復團扇因風託方便街泥巢君屋雙燕令人羨張
公子時相見張公一生江海客文章獻納麒麟殿文采
風流今尚存看君不合長貧賤醉中徃徃愛逃禪解道
澄江靜如練淮南百宗經行處携手落日回高宴城上

烏尾畢逋塵沙立暝途惟有摩尼珠雲夢澤南州更有
赤須胡與君歌一曲長缺歸來乎出無車食無魚不須
聞此意慘愴幸是元無免破除脫吾帽向君笑有似山
開萬里雲論心何必先同調河之水去悠悠將家就
魚米四海一扁舟頭陀雲外多僧氣直到湖南天盡頭
潭府邑中甚淳古還如何遜在揚州但得長年飽喫飯
苦無官況算來休

以右軍書數種贈丘十四

丘郎氣如春景晴風暄百果草木生

一作桃李之下
築自成

眼如

霜鵲齒玉冰擁書環坐愛窻明松花泛硯摹真行字身
藏穎秀勁清問誰學之果蘭亭我昔頗復喜墨卿銀鈎
蠆尾爛箱籛贈君鋪案黏曲屏小字莫作癡凍蠅樂毅
論勝遺教經大字無過瘞鶴銘官奴作草欺伯英隨人
作計終後人自成一家始逼真卿家小女名阿潛眉目
似翁有精神試留此書他日學徃徃不減衛夫人

李君貺借示其祖西臺學士草聖并書帖一編二

軸以詩還之

當時高蹈翰墨場

一作藉甚
翰墨場

江南李氏洛下楊

一作天
下最數

沈與
楊

二人歿後數來者

一作去後
文在誰

西臺唯有

一作
今見

尚書

郎篆科草聖凡幾家奄有漢魏跨兩唐紙摹石鏤見髣

髴曾未得似君家藏側厘數幅冰不及字體歌傾墨猶

濕明窻斐几開卷看坐客失床皆起立新春一聲雷未

聞

一作曾未
聞雷聲

何得

一作
事

龍蛇已驚蟄仲將伯英無後塵

一作縱橫渾
脱若有神

邇來此公下筆親

一作意匠直
與真宰親

使之

一作
公

早出見李衛不獨右軍能逼人枯林棲鴉滿僧院

一作書家

每欲焚
筆硯

秀句爭傳兩京遍

一作詩就爭
傳兩都遍

文工墨妙九原

荒伊洛氣象今淒涼夜光入手愛不得還君復入古錦囊此後臨池無筆法時時夢到君書堂

三至堂

楊公父子孫俱出文昌宮朱轡與別駕同最治民功當年竹馬兒市上白鬚翁相語府門前郎君有家風築室俯飛鳥我來歲仲冬人煙空橘柚梅鵲破榛叢延客煮

茶藥使君語雍容疇昔識二父只今天柱峯故開堂北
門突兀在眼中千秋萬歲後野人猶致恭借問經始誰
開國華陰公

玉照泉

玉照泉與瀟山之玉照峯相直舅
氏李公擇始坎石采泉因而名之

仙人持玉照留在瀟西峯一往不返顧塵痕廢磨礱想
當光溢匣雲山疊萬重有門冽寒泉照影互相容得名
未覺晚學士古人風持節按九城樂此水一鍾稅車東
土飯談笑考百工金瓶煮山腴茗椀不暇攻蘇侯亦靜

者疏鑿濟成功排遣塵滓行石奩清如空能令水源濁
魚鰕來其中生子歲月多徃徃隱蛟龍玉照不見影盤
栢蝸螺宮一朝揭源去枯瀆草蒙茸

延壽寺僧小軒極蕭灑予為名曰林樂取莊生所
謂林樂而無形者并為賦詩

積雨靈香潤晚風紅藥翻盤手散經帙烹茶洗睡昏野
僧甚淳古養拙賁丘園風懷交四境蓬藿底百椽山林
臯壤歟可為知音言而我與人樂因之名此軒孟夏嫗

萬物正書晦郊原隔墻見牛羊定知春筍繁俄頃倒干
戈水攻仰翻盆地中鳴鼓角百萬薄懸門部曲伏床下
少定未寒暄疾雷將雨電破柱取蛟虬我初未知爾宴
坐漱靈根諒知岑寂地竟可安元元

吉老許惠李北海石室碑以詩及之

往時李北海翰墨妙天下石室蒼苔世未知公獨得本
今無價肉字不肥藏兔鋒郎官壁刊佳處同願公倒篋
邀持贈免斷銀鈎輸蠹蟲

吉老兩和示戲答

欲聘石室碑小詩委庭下頗似山陰寫道經雖與羣鵝
不當價畫沙無地覓錐鋒點勘永和書法同人言外論
殊不爾勿持明水照夏蟲

題羅山人覽輝樓

鳳凰山人開竹徑樓成溪山深照映眉間鬱鬱似陰功
壺中有丸續人命勸公洗竹買梧桐何時來駕歸鴻
思齊大任政勤苦來聽天子歌南風

古風寄周元翁

三言

周元翁古人風詩書苦作字工尤有德自琢礪觀古人
怨慧聰眼欲盲耳欲聾黃落後期君同

西禪聽戴道士彈琴

靈宮蒼煙蔭老栢風吹霜空月生魄羣鳥得巢寒夜靜
市井收聲虛室白少年抱琴為予來乃是天台桃源未
歸客危冠匡坐如無傍弄絃鏗鏗燈燭光誰言伯牙絕
絃鍾期死泰山峩峩水湯湯春天百鳥語撩亂風蕩楊

花無畔岸微霰愁猿抱山木
玄冬孤鴻度雲漢斧斤丁
丁空谷樵幽泉落澗夜蕭蕭
十二峯前巫峽雨七八月
後錢塘潮孝子流離在中野
羈臣歸來哭亡社空牀思
婦感蠨蛸莫年遺老依桑柘
人言此曲不堪聽我憐酷
解寫人情悲歌浩歎絃欲斷
翻作恬淡雍容聲五絃橫
坐崑廊靜薰風南天厚民性
人言帝力何有哉鳳凰麒麟
舞虞詠我思五代如探湯
真人指揮定四方昭陵仁
心及蟲蟻百蠻九譯覘天光
極知功高樂未稱誰能持

此獻樂正賤臣踈遠安敢言且欲空江寒灘靜漁艇幽
人知我心悠哉更作嚴陵在釣臺吾知之矣師且止安
得長竿入手來

題安石榴雙葉

紅榴雙葉元自雙誰能一朝使渠隻如何陳張刎頸交
借兵相亡不餘力有情著物指死爭誰能有形而無情
絕句

春風一曲花十八拚得百醉玉東西露葉煙叢見紅藥

猶似舞餘和汗啼

題虔州東禪圓照師新作御書閣

城東寶坊金翠重道人脩惠剪蒿蓬一瓶一鉢三十年
瓊櫺碧瓦上秋空稻田磨衲擁黃髮更築書閣諸天中
三后在天遺聖墨百神受職扶琳宮文思帝澤餘溫潤
雨露下國常年豐章川貢川結襟帶梅嶺桂嶺來朝宗
參旗斗柄略欄楯清坐耳聞河漢風道人飽參口掛壁
頗喜作詩如已公家風秀句刻琬琰邀我落筆何能工

安得雄文壓勝境九原喚起杜陵翁

送權郡孫承議歸宜春

宜春別駕鄉丈人來假廬陵二千石
虛舟無事鷗與遊良賈深藏客爭席
諸公鞭扑立威名公獨愛民如父兄
諸公馭吏如束濕公使人人得盡情人情
居官若郵傳假守攝丞尤自便憂念公家
眉不開誰能勤民廢寢膳贈行欲借筆如
椽公不肯留鼓催船歸到宜春問春事
斑斑笋竿巖破拳廖侯為邦用詩禮府中
無事多燕喜

看公談笑面生春更為鄉園藝桃李

戲題

平生性拙觸事真醉裏笑談多忤人
安得眼前只有清風與明月美酒百
船酬一春

戊午夜宿寶石寺視寶石戲題

石形卧蒼牛巖巔古松陰松風與溪
月相守歷古今初無廊廟姿又不能
礎礧呈文謝珉光撫質愧球琳金馬
與碧雞光景動照臨圮橋授書老陳
蒼雉時禽是皆為

國器不爾事陸沉浮雲有儻來得名豈其心諒如曲轅
社長免斧斤尋智士貽美謚自珍非世琛不材以為
闕
吾與汝同音

戲題承天寺法堂前栢

樹底滿團禪老家高僧倚坐日西斜有人試問西來事
無處安排玉如意方者風幡動不問不道風幡境亦空
開口已非無問處高僧不語人歸去

陳吉老縣丞同知命弟游青原謁思禪師予以簿

領不得往二公雨久不歸戲作百家衣一首二

十韻招之

關日百家衣命
小兒女婦也

天高萬物肅虛寂在川釜肅此塵外軫隨山上嶇嶽列
宿正參差凝霜露衣襟驚鳥縱橫去孤猿擁條吟不覩
白日景惟覩松栢陰南州實炎德看差香森沉芳草亦
未老黃花如散金中有冥寂士上有嘉樹林遺掛拂在
壁靡靡遂至今阿閣三重階曠望何高深能使高興盡
山水有清音所在可遊盤春醞時獻斟玄雲拖朱閣小

雨遂成霖挾續如懷冰夕息憶重衾瞽夫違盛觀何用
慰我心孤燈暖幽慢願言思所欽良游常蹉跎賤與老
相尋佳人殊未來忽忘逝景侵南榮戒其多離思故難
任明月難暗投聊欲投吾簪

同吉老飲清平戲作集句

即普覺

飛蓋相追隨攜手共行樂我有一樽酒聊厚不為薄珍
木鬱蒼蒼衆鳥欣有託密竹使逕迷初篁包綠籜有淦
興南岑森森散雨足萬物生光輝夕陰暖平陸蠶月觀

時暇振衣聊躑躅
沉迷簿領書未嘗廢
丘壑王度日清夷
鎮俗在簡約人生非
金石親友多零落
漆園有傲吏君平
獨寂寞所願從之游
逝者如可作

效孔文舉贈柳聖功三首

六言

武庫五兵森森名駒
萬里駸駸英風爽氣
如林讀書鑿井欲
深學道却要無心

妙年玉質金相學問
日月悠長良賈故要
深藏屈體下心堂堂
灰頭土面輝光

王良終日馳驅曹商百乘從車七茅鼓舞羣狙學問聖處功夫千古與我友俱

藥名詩奉送楊十三子問省親清江

楊侯齊北使君子幕府從容理文史府中無事吏蚤休
陟釐秋兔寫銀鈎駝峯桂蠹樽酒綠櫺蒲黃昏喚燒燭
天南星移醉不歸愛君清如寒冰玉葳蕤韭薺煮餅香
別筵君當歸故鄉諸公為子空青眼天門東邊虛薦章
為言同列當推轂豈有妬婦反專房射工含沙幸人過

水章獨搖能腐腸山風轟轟虎須怒千金之子戒垂堂
壽親頰如木丹色胡麻炊飯玉為漿婆娑石上舞林影
付與一世專雌黃寂寥吾意立奴會可忍冬花不盡觴
春陰滿地膚生粟琵琶催醉喧啄木艷歌驚落梁上塵
桃葉桃根斷腸曲高帆駕天衝水花灣頭東風轉施牙
飛廉吹盡別時雨江愁新月夜明沙

次韻舍弟喜雨

時雨真成大有年斯民溝壑救將然

闕

根肥

闕

桑葉大

春傭未鉏蠶未眠奔走風雨連曉色起尋佳句寫田拳
李成六幅驟雨筆掛在東南樓閣前

答何君表感古冢

黑頭萬蟲地上行大鈎鉅冶之化生反復生沒如車軫
直與歲月為將迎至人獨解諸物撓鍊神含嚼太和精
不取造化相經營三天八景遂飛昇何郎少年毛骨清
天機純粹氣坦平子有青簡當刊名應知鍊修未易成
一世危脆無堅凝外慕掩襲真氣零朝花薄莫不能榮

琳宮金書有丹經胡不還魂游黃庭何為臨冢惋枯形
使予丹元童子驚

會稽竹箭為靳春傳尉作

會稽竹箭天下聞青嶺霜竒搖紫雲金作僕姑如鳥翼
壯士持用橫三軍邇來場師無遠慮剪伐柔萌薦薶茹
人間禦武急難才不得生民飽霜露嘉瓜美果無他長
取弁俎豆獻壺觴奈何生與此等伍大器小用良可傷
吾聞先王用人力不足有餘無損益碩人俟俟舞公庭

長詠國風三歎息

還深父同年兄詩卷

四體懶不佳百蟲夜相煎呼燈探床頭忽得故人編一
哦肺渴減再讀頭風痊清切如其人石齒漱潺湲園林
秋郊靜桃李春晝妍雍容比興體百物落眼前仍仍愁
時語聽猿三峽船梅黃雨撲地水白鴈橫天歎息夜渠
決屋角月上弦把卷著床頭我知其人賢昨日河間令
橫胥不顧錢如臂使十指從我伸與拳淹留落閒處坐

研考二篇更使有閒日
歌嘲拾蘭荃何時造化手
端為鑄龍泉

次韻答宗汝為初夏見寄

宮蛙無時休不知憂復樂
天日半規黃冉冉納莫壑
鳥棲松隕花風下竹解籜
南箕與北斗磊磊貫纓絡
懷我隣邦友賢義本不薄
箕斗常相望江含霧冥漠
忽烹雙鯉魚中有初夏作
詩詞清照眼明月麗珠箔
間出句崛竒芙蓉依綠萼
雄辨簡色空韓盧逐東郭
終篇談不二

自脫世纏縛此道久陸沉喜公勤博約盈寵惠石芝鳥
皮剥猿獍野人烹嘉䟽回首葵莢惡勸鹽殊未工追呼
聯纏索聞君欲課最豈有不龜藥我民六萬戶過半客
棲泊棘端可沐猴且願觀其削官符晝夜下朝播責莫
穫射利者其誰登隴轡繁弱昨聞數邦貢曲禮賦三錯
恭惟廊廟上獻納及新瘼繡衣城南來免冠謝公忤歸
乘下澤車絕意麒麟閣田園蒙帝力仰以萬壽酢公材
橫太阿越砥歛霜鏑智囊無遺漏膽量包空郭行當治

狀聞雄飛上碧落我材甚不長有地愧盤礴平陸非距
心滕薛困公綽看人取卿相妄意亦纔嚼終不作湘纍
憔悴吟杜若一心思傾寫何時叩扁鑰

答周德夫見寄

自我官東南久無西北書周郎縱橫才歛唾落明珠寄
聲相勞苦敦厚不忘初窮山江莽蒼曾次亦寬舒念君
懷白壁故作短褐趨秋官方按劍不與計吏俱驚嗟相
見晚天子識嚴徐想當蒐逸民耕釣起海隅鶴翎需啄

抱龜尾且泥塗功名好采采五白成一呼小人丘壑心
日月半謝除何時真得歸猿鳥為先驅投身嬰世故葛
蔓恐難圖相思欲寫寄滴盡玉蟾蜍

招隱寄李元中

吾間李元中學為古人青出藍眉目之間如太華一段
翠氣連終南我欲從之路阻長朱顏日夜驚波徃蒼梧
玉琯生蛛網老翁忘味傾心賞眼前記一不識十谷中
白駒閱音響潯山南間卧青牛萬壑松聲不得游願君

為阿閣之紫鳳莫作江湖之白鷗

送晁道夫叔姪

晁氏出西鄂世家多藝文文莊和鼎實尚書亦大門簡
編自襁褓簪笏到仍昆向來映軒冕頗據要路津恩勤
均骨肉四海一堯民無咎晚相見實惟諸晁孫智囊似
內史筆力窺文園詞林少根蒂斯人今絕倫我為折腰
吏綠綺網蛛塵傾心得僚友燕及脊令原嘉肴味同和
絃誦聲相聞如人逃空虛見似已解顏何況金石交廼

其骨肉親二年吟楓葉忘我木索勤行行不忍別共醉
古柳根樽前猶講學夏夜衆星繁念當侍白髮甘旨共
蘭蓀帆檣灑風雨浪波出蛟黿持一作侍親慎一作慎行李
強學加飯飧革囊走官郵寄書還相存阿四去大農六
典與討論君到輦轂下為問平生言儻登鄴王臺多話
歸參軍

戲贈潘供奉

潘郎小時白如玉上學覓歸如杜鵑當年屢過乃翁家

沽酒煮蟬不論錢大梁相逢初不識黃塵漬面催挽船
不如去作萬騎將黑頭日致青雲上

次韻惜范生

范侯軀幹小實有四海心稍臞疑內熱不怒見勇沈沽
玉市無價汲泉井方深得失有毫末明年斧可尋

和冕仲觀試進士

人圍廟垣重鼓作宮漏曉晨門傳放鑰坐入荒庭杪初
如求木猿稍若安巢鳥黃鑪答拜辱月淡秋天杳發題

疏疑經按劒或驚矯官曹

闕

坐起迺卒禁紛擾僂趨蟻

爭丘癡坐鷺窺沼江淮有名翬專場或孤鷺袖手深槃

礪乞靈頗環繞稚旄半父子相面多中表鴻將鴈行

闕

牛舐快犢小墨泓黥寒雲筆尾撼叢篠雕

闕

寄鼻詠攘

略傾耳剝剖蚌得珠難揚沙見金少遺形歌冠屨忘味

弃眊眊雖揮魯陽戈餘勇事未了喧閤遂一空星河明


未杳

山谷外集卷十二

謹案第十頁前四行蒲柳望秋凋刊本蒲訛流據
別本改

第二十頁前三行醉拈枯筆墨淋浪刊本墨淋浪
訛嘗墨色據別本改





總校官庶吉士臣張能照

校對官中書臣王家賓

謄錄監生臣姚元開